



Галина САВИНА

# КЫШЕТ

Галина САВИНА

# КЫШЕТ

Веросьёс

Ижкар  
2015

УДК 821.511.131-32  
ББК 84(2=664.1)6-44  
С13

**С13**

**Савина, Галина Яковлевна.**

Кышет: веросьёс / Галина Савина. – Ижкар:  
«Удмурт дунне» газетлэн редакциез, 2015. – 42 бам.

**УДК 821.511.131-32**  
**ББК 84(2=664.1)6-44**

© «Удмурт дунне», 2015  
© Савина Г.Я., 2015  
© Корнилов Д.Л., фотография  
на обложке, 2015

# ПУШТРОСЭЗ

Кышет . . . . .	6
Шунянь . . . . .	15
Дусым . . . . .	24
Жингыртэ анайдылы . . . . .	29
«Мон Инмарез аджи» . . . . .	34

# Кышет

**Р**ая атайтэк будйз. Школае вылысьтыз вылаз кышъям дйсен ветлйз. Анаез нылзэ кырсь дэре-мен өз нуллы, нош одйг гинэ сяськаезлы выльзэ басьтыны моçез өз тырмы. Лизапай агаезлэсь Толя пизэ будэтйз на. Кышноез висьыса кулэм бере Лади юыны кутскиз. Улонлэн пыдсаз усем воргорон өз ни тупатскы: кудзем йырын толалтэ кынмыса кулйз.

Кышномурт çукнаысен жытозь фермаын ужаз. Нылпиосыз медаз кынме шуыса, сисьмем корказэ вазь ик шунтыса кошкылйз. Рая пеймыглэсь туж кышкалляз. Со дырысен ик, лэся, адзонтэм кариз анаезлэсь ужзэ – фермаез. Тйни ук Светалэн мамает почта нуллэ, чебер сумкаен ветлэ, уксё люкылэ. Огпол Раялэн но кырымпыдэсаз көжы кадь котырес кампет кисьтйз. Со дырысен ик нылаш почтальон луыны малпаз.

Лизапай Толяез но жалыз, анай-атаез кулэм пу-мысен пияш укыр кайгыриз уго. Востэм, тōды йыр-сийе пияшлэн пальпотыкуз но синьёсыз жожмыт уч-кылйзы. Раялэсь куать ареслы бадзым Толя, кылзэ вератэк, юрт котырын ужаляз. Ческыт сиён өз йōтылы бере, нылпиос коть йōл юозы шуыса, кыш-номурт скал басьтйз.

Толя юрттйськиз ке но, кыче өз тырмылэ пи-осмурт киос! Пу даяно, турын турнано ке, Толяен кыкназы гинэ лашкинто вал. Бакча гыроно ке, одно кинэ ке медьяно. Нош кин лыктоз? Огезлэн кышноез уг лэзы, мукетыз вина куре. Озы-а, тазы-а – бергаз Лизапай. Ужамзы понна воргоронъёс куддырья ассэ курылйзы ке но... «Оло, бызёно шат?» – малпаз кыш-номурт. Собере аслыз ачиз шуылйз: кин-о кык ныл-пиен адыми доры вуоз? Юртъере но пограмын, ачим но дырылзэсь вазь пересьмемын. Вазьгес малпасько-но вълэм. Нырысь синмаськем муртэз сьōрлось узыр кышно басьтйз но, Лизапай мукетсэ өз угча ни. Нош егит дыряз, оло, яратытэк бызъыса но, та дырозь дышысал ини. Табере тани кыче секыт йōтэ!

Нылыз анаезлэсь сюлмаськонъёссэ өз ик шōды-лы кадь. Рая будэмяз дйськутэзлэсь воздаськы-ны кутскиз. Тйни ук Светаез чиганъёслэсь басьтэм горд пужыё кофтаен ветлэ. Нош Рая нуналлы быдэ анаезлэсь егит дыряз нуллэм ыжгон жилетсэ дйса. Эшьёсыз, дйсьсэ гинэ өвōл, ассэ но мирошка шуы-са исало на. Жаль потйз Лизапайлы нылыз. Но мар карод?

\* \* \*

Жыт сиськыны пуксемзы бере Толя школалэн директореныз кенешемзэ вераз:

– Анай, Николай Спиридонович монэ бухгалтере дышетскыны косэ: лыдъяны-чотаны визьмыд, пе, вань.

Лизапай номыр өз куареты. Пилэсь дышетскыны мылкыд каремзэ кышномурт шөдытэк өз улы, нош семьялы со юрттйсь вал ай, собере коньдон но өвөл. Иже сюрес вылэ гинэ көня кулэ!

Анаезлэсь вазыымтээ валаса, Рая куаретйз:

– Анай мыным эшъёсылэн кадь бурки но уг басьты, кышъям гын сапеген ветлйсько, а тон ке городэ мыныны малпаськод. Ужа вал гидад. Городэ кошкид ке, тыныд нош уксё кулэ луоз. Тау шу ай: ми дорын ульд, нылпи юртэ өз сётэ.

Толя пось картошкаеныз гульдэ вал. Лизапайлы но пиез азын умой өз поты. Нылызлы чурыт куаретйз:

– Мон огдэс но ой люкы, тонэ, Рая, мон кадь висись медад луы шуыса, секыт ужлэсь но ути, нош тон агаедлы озы мытылйськод!

Рая анаезлы вазытэк өз чида:

– Жаляд бен, кызы-о? Толикез тон весь жаляд – сирота ук со, а монэ, аслэсьтыд нылдэ, корка ворсаса кельтйськод вал. Огпол коть кампет басьтэмед вань-а? Одыг гинэ ныльд, а тынад монэ чебер дйсьмед но уг луы! Мон асме кинлэн нылыз шуыны но уг тодйськы. Кин-о мон? Мирошка! Тынад весь уж

вал: Толикен нюлэскы, Толикен турышлы, Толикен фермае, мон – весь огнам. Табере Толикез ик городэ. Адэме уг поты ни со фермадэс но, асьтэдыз но!

Рая сиськытэк ик жок сьорысь султйз. Толя но Лизапай ог-огзы шоры учкыны өз дйсьтэ.

Но, толэзь ортчыса, Толя Иже мынйз ик. Школалэн директорез сюлмаськемен, председатель соглаш луиз пияшез колхоз чотын дышетыны.

Секыт потйз Лизапайлы огназлы. Гурт ужез Толя быдэсья вал ай, табере соиз но кышномурт вылэ усиз. Раяез солы юрттыны өз дыртылы, но йөлэз яратэменыз, лэся, скалзэс кыскылйз ик.

Нылызлэсь сыче йонтэм луэмзэ Лизапай валатэк кылиз. Ведь зечлы дышетыны тыршиз, сюлмаськиз анай, нош со лек сямо луиз. Öz вала кышномурт, нылыз вожа шуыса. Нош Рая зол вожаз, анаез Толикез гинэ яратэ кадь потйз солы. Собрере чебер улонлы со укыр вожьяськиз, нош анаез нылзэ кильтро дйсьяны өз быгаты.

Возьдаськиз Рая корказылэсь но. Сьорлось егит пиос нылаш сьоры быззылйзы. Нош Рая соосты капка азёзь келяны өз лэзылы. Юмшаны со өз возьдаськы. Лизапай нылызлэсь макнязэ төлзтыны выриз ке но, Рая анайзэ мөгзытьяз гинэ. «Тон но «лушкаськид» ук, уг куаретйськы ке, ой шодылы кожад-а воргорон пыртамдэ?»

Анай өз куареты ни.

Нош Рая калгиз, калгиз но сьорлось зеч карт шедьтйз. Ачиз укыр шаян, соин, лэся, востэм



Ванялы бызёно кожаз. Оло, узыр семьяе сюронэзлы шумпотйз-а? Рая анаезлы соку ик шуиз: сюанлы коньдондэ эн жала, тон понна мыным возьдаськоно медаз луы. Со бездэм кышеттэ но вошты ни.

Лизапай пенсизэ пичиен-пичиен люказ ик, но малы гинэ со тырмоз? Скалзэ вузатэк, амалыз ой вал.

\* \* \*

Мурт гуртын Рая нырысь востэмгес ик улийз. Бёрысь кузё кариськиз. Картсэ солань но, талань но каремез луэ шуыса, валаз но нокинлэсь өз кышка, анайзылэсь но кепыр ваёнэз быриз.

Ваня мушкасьын ужаз бере, чай юыны одйг-ог выль чечы вайылийз. Рая картэзлы доразы но муш вордыны чектйз. «Ма, кызы ке одйг уморто соку басьтоно», – соглаш луиз Ванька. «Басьтыны котькин быгатоз, тон уксётэк шедьты, мушьёсыд кияд ук, – индылийз кышноез. – Кызь уморто пушкысь көня муш семья палдэ, кин чота. Вай доре, нокин уз тоды».

Ванялэн анаез Одоть кенэзлы пумит кыл вераны өдьяз гинэ, Рая сое уретйз: «Аслад сэрегад черсыса пук ай, тынэсьгыд юась өвёл».

Арня ортчыса, Одотылэн садаз кык муш уморто кылдйз. Бускельёс кырыж учкылызы ке но, почта нулйсь Рая чужмуртэлэсь басьтим шуиз. Пудозэс но соос йылтйзы, мумы парсь, кунян басьтйзы. Анайзы сюдэ, кенэз пиеныз базарын парсьпи

вузало. Байкемзья Рая адямиосыз тодмамысь дугдйз, узырѣсынгес кушласькыны тыршиз.

Лизапай нылыз умой интыяськемлы шумпотйз. Тани Толя пиез но корка пуктыны кутскиз. Солы пичиен-пичиен юрттйз. Ярам, гурт калык өз кушты. Лизапаез но, пизэ но гажаса, жыны гуртэн веме каризы. Раязэ анай юрттйськыны возьма ик вал но, соиз скалмы кунян вайыны кулэ шуиз. Коркатуй карыкузы, нылыз вуиз ик, кузым карыса, ведра чечы ваем. Анаезлэн паймытйськемезлы Райка серектйз гинэ:

– Весь чечы сием потоз кожасько вал, анай. Чечыен но кёт тыре вылэм. Адямиослэн эмьюмлы но та зарнизы өвёл, милемлы вузаны но тырме.

Нылызлэн ушгьяськемез кышномуртлы өз кельшы:

– Нылы, озы мултэс аксымьяськыны уг яра, калыклэсь висьяськыны эн тыршы – син уськытозы.

– Ой, анай, мед вожьяськозы, соос мон сямен, кёс нянь сиыса, өз будэ, мынам тон сямен улэме уг поты. Ческыт сиеме, чебер дйсьяськеме потэ.

Лизапай номыр өз куареты.

\* \* \*

Коркатуйысь бертйсь кузпальёсты анайзы валесын пумитаз. Скал кыскыны потыса, Одоть өс выжые усем. Кык-а, куинь-а час отын кыллем, бускель кышно шедьтыса пыртэм но «скороез» өтем. Врач вуиз но мылкыдзэс куашкатйз гинэ: анайдэс, пе, пери шуккем.

Озы Рая вылэ юрт котырысь уж усиз, Ваня пудо сюдйз. Пинальёссы пичиесь на, юрттыны уг ярало ай. Эшшо Одотез чаклано. Рая пазяськыса ветлйз. Вань уж вылаз вуэм бере гинэ анайзылэсь кулэ-лыксэ валаз. Нош пересь мурт өз катяськы ни.

Соку Рая аслэсьтыз анайзэ дораз вайиз. Табере вань секытэз Лизапай вылэ усиз. Ярано, нылызлэн пиез но нылыз пумен юрттйськыны вуизы. Рая ана-езлэсь пенсизэ ачиз октйз: пересь муртлы, пе, уксё малы кулэ. Толялэн сюаназ мыныны кузьымлы уксё курыкуз, нылыз чоғиз: «Будэтэмед кузьым мед луоз, эшшо мар кулэ на?..»

Жожомиз анай, но өз куареты. Нош синву кисьтон азыланьын вылэм ай.

Лизапай урод сюдэмен-а, висён шедьтэмен-а, гидысьтызы оgez бёрсы оgez сизьым парсьпизы кулйз. Рая соку анайзэ кылыныз гинэ өз, кыныз но вось кариз. Ужаны мылыд потытэк, висисько шуыса чёлкиськод, пе, көня ваньбур төлъя-бурья кошкиз. Вожомем куеныз, гур азысь пис кутыса, анайзэ шуккиз. Огпол, кык пол... Ярано: картэз корка пыриз но кузпалзэ палэнтйз. Люкисьлы тростес сюре шуэмзы зэм вылэм – Ванялы шедиз гинэ.

Лизапайлэн сюлмаз ик йөтйз нылызлэн вось каремез. Огпол гинэ жугысал ке, вунысал, нош сьораз ортчем нылыз, картсэ но кокаляз, эмеспиез пала пырись анайзэ но өз жаля.

Лизапай чидатэк одйг-ог юылыны кутскиз. Юмшаса бен өз ветлы, но Рая шөдытэк өз кылы. Анайзэ

жугыны эшшо муг сюриз. Лизапай уксё курыкуз, нылыз, юыны куриськод шуыса, кылэм ик өз кары.

– Рая, ма, мыным кышет но кулэ, дыр, таиз зү-стари луиз ини, – синкыли пыр куаретйз пересь мурт.

Нылыз, номыр вазытэк, висьет сьöры ышиз. Лизапай, пыдвыл кертйсь мурт, мазэ-созэ ик өз вала ымныраз кык-куинь кышет вуэм бере. Рая Ванялэн анаезлэн сандыкысытыз вашкала кышетгёссэ озы сэрпалтйз. Лизапай зар-зар бёрдйз. Быдэс гумырзэ фермаын ужаса, пенсия басытыса, одйг выль кышет но басынтэм шат? Нылызлэн из сүлэмо луэмеж жожомытйз сое. Озы пуконьяз доразы Толя пыриз. Анаезлэсь чыжектэм сингёссэ адзыса, пиез сүлэм-шугьяськиз:

– Анай, висиськод шат?

Зеч ваземез витись песая тае гинэ возмам, шөдске. Гуньдылыса-гуньдылыса сүлэмшугзэ кысйтйз. Толя шып кылзйз, собере анаезлы шуиз: «Ойдо ми доры». Рая, тае кылыса, бакомиз. Озы но тазы анайзэ ас палаз берыктыны выриз ке но, Лизапай дйськутсэ кышетэ шып гинэ бинялтйз. Йырыз курен Рая Толялы куаретйз: «Пенсизэ мон тыныд уг сёты, милемлы но корка пуктоно ай».

Агаез лякыт гинэ вазиз:

– Кулэ өвөл, Рая, мон но, кышное но ужаськом, ваньмылы тырмоз.

Лизапай Раялэсь сэрпалтэм кышетгёссэ нылызлы ик сётйз:

– Ме, Рая, утялты анайдылэсь ваньбурзэ, туклячи соосты, тазы мед куялод шуыса, сандыказ өз тыры вал, дыр.

\* \* \*

Со дырысен уно арьёс ортчизы. Кемалась өвөл ни Лизапай. Толяез дорын песяй гань-гань улиз. Пересьмиз ини Рая но, быдэ вуизы нылпиосыз. Нылыз, ачиз сямен ик, сьөрло бызиз, пиез анаез кадь шаплы кышно басьтыз. Только вот Раялэн кензэ вормемез өз луы. Кенэзлэн ужез өвөл шуыса, кышномурт почтаысь кошкиз, интыяз пиезлэсь кузпалзэ кельтыз. Кенэз анайзылэсь пенсизэ ачиз басьяз. Рая, Лизапай сямен, пересьмыса юыны кутскиз. Бездэм кышетэн ветлыны гурт калыклэсь умой өз поты. Кенэз вылезлы пенсизэ өз сёты. Озы огнунал Рая, кеносысь Одоть анайзылэсь сандыкысьтыз нафталин зын пычам кышетъёссэ поттыса, одйгзэ йыраз керттыз. Кашамер кышетлэн пужыё тусыз песяз жожомытыз. Оло анайзэ вось каремез тодаз лыктыса-а, оло егит дырзэ малпаса-а, Рая кема бөрдиз...

# Шунянь

Гуртын туннэ пенсия люкылызы. Арлыдоос ваньмыз сямен магазин пыр бертйзы. Параска но почтаысь дораз өз мыны, кеньыр, сакыр басыто но кариськиз. Лавка доры вуыкуз, пумитаз Наталь сюрриз, кык сумка октйськем. Нылкышноос сйялэс зечьяськизы.

Магазинын вить-куать мурт сылэ. Параска чырт-кемьяськиз но өйтөд кудзылэсь юаз:

– Мар-о Наталь сомында басыяськиз ай, вань вуздэс өз быдты-а?

– Толон гинэ товар вайизы, ваньдылы тырмоз, – коньдон чотанъяз шуиз продавец Валя.

– Али ик нуны сюанлы дасясько ни шат? Кензы, пыд азьзэ адзытэк, мырдэм ветлэ ни, – йыркуро куретйз нылкышно.

– Нош тынад йыртышкар йөтэ, о-о, Параски, Володя Зинадэ кулэ өз кары но бускель гуртысь Любаез басытйз шуыса, – будэтйз вуз карись.

– Зинае солэсь устогес карт шедьтоз ай. Со мынам чебер но, визьмо но, – меҗкыгӳз Параска. – Нош со Любазылэн тусыз но огшорыгес, мугорыз боды кадь, сандыкез но, пе, буш вал. Мынамеzlэн пирданэз кык машинае но уз тэры.

– Однако, пирданэн но кулэ өз каре кадь дыдыдэ, – серектӳз бускелез.

– Мыскыллялэ, ойдо, адӓом ай, кин шудо луоз, нош кин бӓрдоz, шӓдтэж ум кыле, дыр, – шуиз Параска но укно пала берытскиз. Черодэз вуытозь, со нокинэн но өз вераськы ни. Со куспын лавкае Натальэн бускелез пыриз. Кыллы бырем Нина чанчан куараеныз кутскиз:

– Умоесь-а, кенакӓёс, выль ивор тодэмды потэ-а?

Магазинын сылӓсь кышноос, коҗоос кадь, ымзэс усьтӳзы.

– Татчы лыктыкум, Микол Натальёс дорысь «скорой» кошкиз. Любазы шугектэм.

Параска пельёссэ сак кариз. Ас понназ малпаз: кыҗе усто учыр тупаз ай.

– Параска апай, мар басьтод? – кышномуртлэсь малпанӓёссэ куспетӳ кариз вуз карись.

Нылкышно огшап шып сылӓз но, уксётэж лыктыськем шуыса, лавкаысь пырс потӳз.

\* \* \*

Параска гушьяса-гушьяса ик нюк улысь ошмес дуре васькиз. Гуртоос татчы гужем җем ветло:

вулы но, миськем арбериоссэс гыльяны но. Нош толалтэ кожасез ичи. Параска ведра пуктон инты бушатйз. Дорысьтыз дыртыса потйз, лымы мычон лопата кутыны йыраз өз лыкты. Секыт шуыса, ведраоссэ пачыл-пачыл өз тырмыты, корка дорозяз кыдёкегес ик мыноно уго. Но таёе муг шедыку, со кык-куинь иськемез но ортчыны дась.

– Параски, толалтэ куазен ошмесэ васкад шат, колонкады кынмиз-а, мар-а? – вазиз пумитаз сюрем кышномурт.

– Кынмем, лэся, – йырзэ жутьятэк, шуиз со.

– Ма, милямаз ву бызе, кож вал, – уг дугды бускель урамысь кенак.

– Тйляд вуэныды чай ческыт уг луы, напез но уг поты, – будэтйз Параска, ас понназ пумитаз шедем адымиез тышкаськыса: мар ужез, кытысь мон ву вайисько, солэн пельпумьёсыз уг жадё ук, акылес боды.

\* \* \*

Любалэн көтыз вандэм кадь вöсь луэ. Огшаплы лэзе но, нош ик кырме, азъвыллэсь но зол шымыртэ. Врач учкиз но кышномуртлы шуиз, вазь на ай, пе, чида. Нош кызыы сыёе вöсез чидалод? Көй мугоро акушерка, зök чиньюссэ позырьяса ик, Любалы шуэ:

– Нырысьсэ вайисьёс кема курадзо, жытозь уд ворды на.

Выль кенлэн синвуосыз ик потйзы, нош трактор мугоро акушерка серектйз гинэ:



– Пиосмурт улэ выдыны гинэ капчи, соку өд бөрды, дыр, табере чида.

Палатаын Любаен чош уйлсь нылкышно шуиз:

- Эн кылзы со пересь куркаез, ассэ нокин кышно басьтымтэ но, лексэ асьме вылэ кисьтэ. Тон выдыса эн кыллы, кызы умы, озы ик кариськы. Көтыд чемгес но чемгес вось луэ ке, озыен, жоген ваёдни.

Нош жытазе кӧй акушеркалы но серем ӧй вал ни, врач но бызьылсь луиз. Соос ӧз валалэ, малы Любалэн пиналыз вордӧськыны уг вормы. Анайлэн вуосыз кошкызы, нош пиналлэн югыт дуннее потон тодаз ик ӧвӧл. Люба ӧз шӧды ни, кызы сое операционное нуизы. Врачӧс нунызэ кӧттӧз поттоно кариськызы. Но татын но егит анайлы ӧз удалты, Любалэн вордскымтэ нылыз пушказ кулӧз. Наркозлэсь сайкам кышномуртлы врач вакчияк шуиз:

– Кыз ар ужатозям, таӧе учырен пумиськылэме ӧй вал на. Ваньмыз чакламья мынӧз кадь, нош пӧрмиз тӧни кызы. Нуныедлэн гогыез чырты котыртӧз кык пол бинялскем, соин ик кеказ, луоз.

Кыӧе кышкыт кыльӧс. Соосты валаны Люба ӧз быгаты. Кызы озы, укмыс толэзь ӧже витем нуны кулэ? Малы, кин янгыш, мар табере кароно? Люба быдэс уйзэ бӧрдыса ортчытӧз. Нырысь нунызэ жалыз, собере ассэ, бӧрысь картсэ. Кызы со Володязлы вералоз, пиналзы лултэм вордскиз шуыса?

\* \* \*

Люба нылетй нуналзэ кылле ини нылпи ваён юртын. Көня улэ ни, сомында ик бөрдэ. Нуныз-эс нонтйсь анайёсты адже ке, гадьёсыз тыро, нош сюлэмзэ пуртэн вандо кадь. Нылыз кулэм сяна, кышномуртлэн аслаз но тазалыкез чутыны өдъяз. Вир кошконзэ врачёс ноказыны но дугдытыны уг быгато. Капельница пуктыло, укольёс бышкало, пичияк умой луэ кадь, собере нош ик вир кошке. Люба нуназезэ кызыны ке чида ай, нош уйин коть чир черекъя. Кызыны укно сьёрын кезыт төл вузэ, Любалэн лулыз но озыны ик бөрдэ. Уйвөттьёсаз пичи нылзэ адже, сыче мусо, чебер, таза кадь со. Нош кылем уй валантэм вөтаз. Гуртазы кадь со. Бускель урамысьтызы Параска тэркы тыр шуэн лыктэм но Любаез куно карыны выре. Ме, пе, си, юри тыныд шуыса бичай. Виль кен пыкиськыны выре, шуэз уг яратйськы, чырс потэ, шуэ. Нош арлыдо кенак вань шузэ корка котыртй пазяз но серекъя: «Э-э, гыдыке, та шу шоры учкыса, эк шу шуод ай». Параска кошкиз, нош лымы вылэ пазь-гем шу гурыос, вир шапыкьёс кадь пиштыса, кы-лизы.

Їукнаяз врач Любаез учкиз но шуиз, Иже келя-но, дыр, тонэ. Тазыны ик виред кошкиз ке, кема өвөл аслыд но нуныед сьёры кошкыны. Вань одйг амал, но соку ноку но пинал вайыны уд быгаты ни. Шут-этскон нунальёсы чаклалом ай, өз ке ортчы, Иже келялом.

Люба бөрдыса палатаяз пыриз. Эшез солэсь ве-  
рамзэ чал-чал кылзйз но шуиз:

– Мон ачим татысь, Кизнерысь, нош быземын  
Киров улосысь Уржуме. Отын туж тодмо туно улэ,  
пор песянай, ми палан сое Такъян гинэ шуо. Тон до-  
раз ветлыса утча вал. Больница юрттыны уг быгаты  
бере, оло, солэн пайдаез луоз. Талэсь уродгес уз луы  
ни.

– Кыззы сокеме мыном? Мынам вамышъяны но  
зигары өвёл.

– Ыуказе көснунал, обход өвёл, карттэ маши-  
наен оть. Процедураос бере пуксёды но кошкоды,  
жытозь вуоды. Кузпалыд сьöраз тыныд дйськут мед  
кутоз.

\* \* \*

Володя пумит öз луы. Укмыс час котырын соос  
сюрес вылын вал ини. Кыксы ик шып мынйзы. Люба  
öз тоды, мар сярысь вераськыны, нош картэз öз вала  
кудлань вазыны, кышноез медаз жожомы шуыса.  
Озы ик ортчизы кузь сюресэз.

Кулэ коркаез шедьтыса, Люба туно доры пыриз.  
Арлыдо кышномурт гур аяз берга вал. Сьөрлось  
кунолы со чик öз паймы кадь.

– Лыктйд бере, чаль татйгес, мар öс дорын  
сылйськод. Ойдо чай юом. Мон туннэ шуэн перог  
пыжи. Анае шунянь туж яратэ вал. Война вылтй  
уго сиён туж ик ой вал. Мемей нюлэскы ветлоз но  
та горд емышъёсты бичалоз, собере я шу кисаль

пöзтыоз, я шуэн пыжиськоз. Солэсь но ческыт сиён  
öй вал кадь, – тодаз вае туно.

Люба зигартэк лэзиськиз пукон вылэ. Нош Такъян  
апай со шоры уг ик учкы. Чай лэзён куспаз шуэ:

– Нылылды Такъян ним пон, ява, чукуныны но  
эн вунэты.

Любаез чабкIZES кадь. Кыче туно со, уг ке адзы,  
нуньез али гинэ кулйз шуыса. Кышномурт ымзэ усь-  
тйз ни вал. Туно куспетй кариз:

– Сюресэд кузь, чайдэ ю но мынэ бертэ.

– Мон татчы чай юыны öй лыкты, – жожомиз  
Люба.

Такъян выль кен шоры кема учкиз, Любаез со  
синьёс сйсьязы кадь. Собере туно жöк вылысь шу-  
нянез басьтйз, ас понназ маке лушкем сипыртйз но  
шуиз:

– Тани та пыжиськемез машинае пуксемед бере  
ик си.

\* \* \*

Параскалэн мылкыд тулыс нунал кадь. Капка  
азыэ мычыны потйз но, бускелез Орина шуэ:

– Параски, кылйд-а, Микол Володяослэн нунызы  
арам луэм, лултэм, пе, вордскем.

– Чик уг паймиськы, муртлэн синвуэз сьöлыкт-  
эм пинал вылэ усиз, луоз. Володялы луыса Зинуке  
кöня бöрдйз. Табере ачиз мед вуоз. Со гинэ мар,  
кышноез нуньез сьöры кошкоз ай, адзод, – вазиз  
кышномурт.

– Остэ, Параска, мар сыҕе вераськиськод?

– Мае тодско, сое ик верасько. Малы, кожаськод, мон тол куазен ошмесэ васькай. Как тодй, Любаез роддоме нуизы шуыса, соку ик вулы васькай. Ведраме тырмытй, доре вайи но тунгонай, Микольё-слэн выль кензы вордыны медаз вормы шуыса. Нош собере, кык нунал ортчыса, кыл вераса, вузэ кисьтй. Кызыы ошмесысь ву бызе, озыы ик Любазылэн вирез мед кошкоз шуыса, – верамзэ валатэк-а, ушгьяське-мез потыса-а, шуиз со.

Орина номыр өз куареты, вылысьтыз вылаз кирос тырыса, азбараз пыриз. Нош Параска, ноқыҕе кариськытэк, капка азьэ мычиз.

\* \* \*

Люба шуэн пыжиськемез кияз кема бергатйз. Мар кароно: куштоно яке сиёно?

– Пöраськемез яратйськод ук, си, нуназе ортчиз ини, тон ке сютэм ай. Бурмон понна сиськыны кулэ, – сюлмаськиз Володя.

Люба куаш куртчиз шунянез. Ческыт ик вылэм яке көтыз сыҕе сюмаз-а? Сиськемез бере кышно-муртлэн иземез потыны кутскиз. Сюрессы кузь бере, гань-гань кариськиз. Но час ортчыса, көтыз чутыръяны кутскиз. Нырысь каллен, собере золгес но золгес. Кышномурт, нуны вайыкуз кад ик, курадзыны өдяз. Огшап озыы мынйзы ик ай, собере Люба өз ни чида, картсэ дугдыны косйз. Люба машинаысь гыж потйз ини. Вöсьлы чидатэк,

нылкышно лымыын погыллыськиз. Картэз, мар карыны валатэк, Люба котыртї берга:

- Мон но мон ини, врачёслы оскытэк, тонэ олокытчы нуи, малы кылзїськи? Кытысь-марысь со туноез тодїд, эмьян интые, ведназ, дыр, – кузпалзэ жутоныняз кесяськиз Володя.

Нош Любалэн вераськыны зигарыз ой вал ни, ымдурёсыз лызэсь, ачиз кодэктэмын, кымеса пёсям вуэз былбырамын. Пиосмурт сое машинае выдтїз. Больницаозь Володя лобаса мынїз. Люба синьёссэ өз усья, одйг-ог лулзылїз гинэ. Озыен, улэп, кышноезлэсь шокамзэ кылзыса, ширтїз Володя. Нылпи ваён юртын висисьсэс ыштїзы ни вал. Картэз Любаез, ки йылаз жутыса, пыртїз. Врач урмыса кесяськиз пиосмурт шоры. Любаез со нырысь кулэмын малпаз, собере йырсазьзэ ыштэм кожаз, нош егит нылкышно изе вал.

...Кык час ортчыса, виль кен сайказ. Соку гинэ гань-гань шокчизы эмьясьёс но, Володя но, палатаын Любаен чош кыллись нылкышно но...

Нош ар но жыны ортчыса, Микол Натальлэн корказ нуны бёрдем куара кылїськиз. Люба нылызлы Такьян ним понїз. Нуны сюанэ соос вань бөляксэс отизы. Узыр жок вылын шуэн пыжиськем но вал.

# Дусым

**К**ельше мыным мисьтаськыны, нош куасьтэм дйськутэз утюганлэсь кӧтвеськантэм уж ӧвӧл кадь потэ. Уката ик пиосмурт дӛремьёсты уг яратйськы. Соосты берлолы кельтйсько.

Тани али но кузпалылэсь нбыль дӛремзэ солань-талань бергатйсько, кутскыны моӇе уг тырмы. Нош кытчы пырод, родной карттэ погмаськем дӛремен уже уд келя ук. Тани та лыз джинс дйсьез яратоно Сергеелы туж тупа, чагыр синьёсыз уката но муресь, гочатйсьез луо. Утюган куспам нош ик тодам лыктэ гажанӛным тодматскеме.

Йӧно адямиос транспортын, пе, уг тодматско. Нош мон йӧно ӧвӧл, вуоно картме трамвайын шедьтй. Солӛн пельпум вылаз умме усиськем. Кондукторлӛн боз-боз куараезлэсь сайкай, берпуметй остановкае вуиськеммы. Йырме жутй но лыз-лыз синьёсы выйи. Тйни соку ик мон валай: всӇ! капец,

синмаськи. Егит адями, монэ сайкатыны кышкаса, аслаз дугдон интыяз васькымтэ. Тйни озыи ми Сергеевым тодматским, чош ик, мукет трамвае пуксыса, кошким. Монэ патер дорозам ик келяз, со дырысен ми чошен. Кышнояськеммылы туэ дас ар тырмоз ни. Нылмы ньылетй классэ ветлэ, пимы туэ школае мыноз...

Нош мар та? Сергейлэн гадь кисыяз кыче ке комокез вань. Утюгме палэнтыса, джинс дэремлэн кисыяз киме лэзи. Пичи кагаз юдэс кёня ке полэс погмамын, токморзёмын ини. Вуын гылскем бумагаысь мырдэм лыдзй: ЛАРИСА, улйяз телефон номер. Номырзэ ой вала, кыче ке тодмотэм номер, кыче ке Лариса...

Шуак йырам шуккиз. Вот албасты! Дусымезлэсь телефонзэ гадь кисыяз нуллэ. Монэ нушыен васькытйзы кадь. Зеч мылкыды но, яратонэ но, чук лысву музэн, төлзйзы, лэся. Жингыртйсько, нокин уг куты, ма со шузи-а, мар-а? Сергей мынэсьтым номерме вераз, дыр, соин ик дусымез трубказэ уг басты. Мар каремме уг валаськы ни. Час шоры кема жёлмаса улй, ку-о ужан нунал быроз, ку мынам калгисе бертоз. Вожпотэменым кытчы пырон инты уг шедьтйськы. Ма, кызы озыи, со монэ яратйсько шуэ уг, малпасько мон. Нош пель сёрам мукет куара серекья кадь: соос ваньзы чебер кырзало. Синучкон пала йырма берыктй. Асме отысь адзйса, бёрдонэ ымдурам вуиз. Йырсие куро кабан кадь, син котырёсам векчи кисыриос шудо, кыкетй ангесы



опиське ни, кускам лэйкась кӱй сярысь веранэз ик  
ӧвӧл. Ма кыӇе пиосмуртэз таӇе кышно гочатоз. Си-  
нучконлэсь мыскыллямзэ валаса, асме утгыны вы-  
рисько. Сергее вӧзам выдэ ке, кыӇе лычсузгыса ма-  
ялля, шуэ: кышномурт урдэм боды ӧвӧл ук, небыт  
луыны кулэ, тон мынам ведь самой-самой...

Нош со дусымез кыӇе меда? Чебер, йӧно, весь-  
крес, дыр. Солэн нимыз но Ла-ри-са, нош мон ог-  
шоры Нина. Сергее Никуль, Нинейко шуэ, кыӇе  
мусо кылӱське. Нош со шоры кызы вазиське  
меда? Лара, Ларисочка, Лариска. Вожаменым  
йыры висыны кутскиз. Асме буйгатыны вырисько.  
Малы нош со кышномурт одно чебер луыны кулэ.  
Оло, со Шапокляк пересьлэн Лариска комакезлы  
укша. ТаӇе малпанлэсь кӧня ке ганякгес луиз.

Со куспын картэ ужысь вуиз. Дас ар ортчыса но,  
мон со шоры учкисько ке, сюлмы йок! вазе. КыӇе со  
чебер, палэнысен, кузпалы шоры палёмыса, улӱсь-  
ко. Чебер картэд чебер туганэныз тонэ пӧяса возё,  
нош тон, нушы кадь, долкаса улӱськод, сазёмытӱз  
йырам чилектэм малпан.

Кагаз юдэсэз Сергейлэн ныр улаз донги:

– Тон солы жингыръяд-а?

Гажанэ номыр валасьтэм тусын нырысь мон  
шоры, собере телефон номерез учкиз. Пельпумь-  
ёссэ выретӱз.

– Ла-ри-са? Ӧйтӧд, оло, жингыръяй но, кин-о со?

Мынам виры ик пазыгиськиз. Учке ай со шоры:  
визьтэм кариськиз. Кин пе, со? Жӱжомыса кышнопала

потй. Уг но танйськы ведь, шакшы, жингырьяй, пе, дыр. Аслым ачим чутрак сокем жаль потй, зар-зар бёрдйсько. Мон ведь чебер дйсяськи, кильтрес буяськи ке, туж тунсыко кышномурт луо. Только кытын ай уксё чебер дйсьлы. Парикмахер доры ветлыны дыр но, шалтыртйсез но уг тырмы. Нылмылэн пидкукез тани куажгамын, пиез школае даяно, чай юыны сакырмы но туннэ быриз. Эх улон, та Лариса сярись тодытозям, мон кыче шудо вал. Нош табере вузэм гинэ потэ.

– Нинуль, сиён пöсятйд-а ни, Ондй но тани вуиз, мынам но кöты сюма?- картэлэсь куаразэ кылй.

Ондй – Сергейлэн выныз, университетэ пырыны дасяське, ми дорын улэ. Агаезлы туж кельше, сгыче ик жужыт, таза, йырсиез гинэ суд. Нош мынамеzlэн – сьöд. Выныз но агаез кадь калгос луоз меда, чилектэ йырам кулэтэм малпан. Малы таид сгыче вазь вуиз ай, жöк сьöрысен Сергеен лулысь-сюлмысь верасько, шуисько вал. Картэ шоры уг ик учкиськы, нырме гинэ кыскасько.

Воргороньёс жöк сьöры пуксизы. Мынэсьтым гордэктэм синьёсме адзыса, Сергей шуэрскиз:

- Нинейко, тон висыны öд усы-а, тусыд аслад кадь öвöл? – кунянэз сямен кымесам шлач! чупаз картэ. – Температураед öвöл.

Йырад дурыен васькыты вал, соку чаяк валасалыд, мар монэн, пуштйсько ас поннам. Эшшо Ондй маке солань-талань берга, ялан телефоная учкылэ.

– Пуксид ке, сиськы адями сямен, – омырски шораз.

– Агайлэсь но юай ни, оло, тон адзыльд, кенак, пичи гинэ кагазын телефон номер гожтэмын вал, – гань-гань юаз пияш.

Вылтйм кезыт вуэн пылатйзы кадь.

– Ларисалэн өвөл-а? – шыпытак юай мон.

– Самой солэн. Тодысалды ке, кыче чебер нылашен мон тодматски. Со телефон номерзэ гадь кисыям донгиз но пегзиз.

Шуак мыным сыче капчи луиз. Сергей шоры учкисько, ачим серекьясько но бөрдйсько. Со номерзэ уг вала.

Ондй картэлэсь дэремзэ дйсям, нош куштыкуз нылашезлэсь номерзэ басьтыны вунэтэм. Нош мон мар но ой малпа, шузи. Картэ монэ бордаз жиптйз но кымесам нош ик шлач! чупаз: «Шузи тон, Ни-нуль, мон ведь тонэ сяна нокинэ уг адзиськы. Тон мынам самой-самой».

# Жингыртэ анайдылы

**К**ыл описькытозь, туннэ ужаськиз. Вылаз ик, кивалтйсьмы пыжиз, эшъёсын мыргетйськиз, уждун но нырултй кошкиз. Табере тани кыкетй трамвае пуксьыны уг быгатйськы, кытысь сомында калык? Ай, ваньзы донгасько, соослы гинэ кытчы ке мыныны кулэ, кожалод.

Нйзили кадь матэктйсь трамваез адъыса, сэзь-пезь кариськи: таяз мон но чуртнасько ни, нюлымтэ куняна кадь, уг сылы. Пыри ведь, буш пукон но монэ возьмам, лэся. Нуш гинэ пукси но йырме укно пала берыктй, жадемен-а, мар-а быдэс мугоры гуэтэ. Йыр пушкам туп чыжало кадь. Коть пересъёс но пияно кышно-муртъёс медаз пыре вал. Соослы инты сётыгэк, уз луы, нош быдэс час сылыса бертыны каты өвёл.

Пель дорам ик кесяське наш-наш буяськем кондуктор. Коньдон уз сётэ ай солы! Ымныр шораз учкыса ик, бакомод, кышкаменд дас сизьым манет

гинэ уд, быдэс уксё пуйыдэ кияз донгод. Оди́г оста-  
новка ортчим, эшшо трос калык пыри́з, ваньмыз  
ужысь берто, дыр.

Нош таиз кытчы чуртнаське меда ни, вожпатыса  
учкисько вылаз газетьёс ошылэм пиосмурт шоры.  
Мон сое нуналлы быдэ сямен адзисько. Ъ́укна уже  
мыныку ик, со газет ё́ектэ ни. Ачиз уг но тоды, лэся,  
мар отын печатламын, вераны курадзе. Тазы пайда  
поттйськод ке, коть чебер вераськыны дышетскы  
вал. Солань-талань, оло, дас пол ортчиз ни. Чангес  
кураеныз адымиосты ё́ртэ: басы́тэ, пе, басы́тэ газеть-  
ёсты. Вот пуллёсир, мылкыд карисьёс өвёл ке, пот  
но кошкы вал ни.

Таиз потйз, табере егит пияш гитараен пы-  
ри́з. Яратон сярысь кырза́, ыж но солэсь шулдыр  
бо́ксэ, дыр. Таиз но уждун утчаны потэм адыми.  
Пычкиськыса кырзаны выре, но шораз учкись ик  
өвёл.

Удалтымтэ артист кошки́з, оди́г остановка орт-  
чыса, трамвае пыризы мукетьёсыз. Дас-дас кык  
аресьем нылашлэн арганэз сёрысь ымнырыз гинэ  
адске, вёзас выныз, лэся. Ныль-вить аресьем  
пияш возьдаськыса-а, кышкаса-а апаезлэн кияз  
кырми́ськем. Ваньмыз сямен пукисьёс йырзэс  
улно пала берыктйзы. Мон но шоразы мыр-мыр  
ой учкы. Сы́че нылпиосты адзиськод ке, жалясь-  
код но, вож но потэ. Коньдон сётытэк, умой өвёл  
кадь, нош сётйд ке, оло соосты анай-атайёссы озыы  
ужато но уксёзэс юонлы талало, оло пинальёс,

дышетскемзы потытэк, пайда утчаса, ветло. Кытчы учко анай-атайёс...

Тани нылаш арганзэ кысканы кутскиз, чебер шудэ. Куаразэ кылыса, мугоры ик юзыр-кезыр луыса кошкиз. Мар сярысь кырза та сыче жож? Анай сярысь. Синьёсме вошгьятэк, учкисько пинальёс шоры. Пияш, возьдаськыса-а, нэнийэ малпаса-а, йырзэ ошем но пичи мыжыкжэсыныз синвузэ чүшылэ. Нылашлэн куараез дыректэ ке но, кырзанзэ азыланьтэ, трамвайын пукисьёслэн синмазы ик учке. Мынэсытым бөрдэмме адзыса, солэн но синьёсыз бусаськизы.

Гужлась трамвайын шуак сыче пыпыт луиз, нымуртлэн куараез өрьяськыса вагон кузя кошке кадь. Тросэз ныркышетёссэс потгйзы, кин ке йырзэ мыкыртйз, мукетыз синзэ чүшылйз.

*Тодмо тусбуйдэ син азиям пуктійсько,  
Мусо ваземдэ али кадь кылійсько.  
Кызыы вешаськод вал монэ, анае,  
Уг луы тодам ваеме.*

Кырзан кыльёс кондукторез но бугыртйзы, лэся, билет вузанзэ ик вунэтйз. Телефон пыр бадзым куараен вераськись воргоронэз со гырпумыныз донгйз: шып кариськы, пе.

Учкисько пинальёс шоры. Удмуртжэслы но, зучьёслы но уг кельшо. Дйськутсы вуж, посйськемынгес, но чылкыт. Киоссы но чылкытэсь, гижьюссы

вандылэмын, урам нылпиослы уг тупало. Нош кырза нылашед зэмзэ но чебер, выныз но сьобраз нёрьяны выре.

Кырзан быриз, тани уксё мыр-мыр куроzy. Ӗз, трамвай кузя огпол гинэ ортчизы, номыр Ӗз куаретэ. Коньдон сётисьёслы тау карыны Ӗз вунэтэ. Адямиос ваньмыз сямен уксё пуйызэс поттазы, кин корт манетьёс пияшлэн сумкаяз кисьтйз, кин кагаз уксёзэ но Ӗз жалья. Нылпиослэн бӖрсязы учкисько, мар карозы. Дыдыен-эте сиён-юонэн вуз карись магазинэ кожизы, потэмзэс адзыса, ӧй вутты, трамвай вырзиз.

Огшаплы чалмем трамвайын нош ик гуж! вазыны ӧдяз. Кин ке «миське» нылпиосты, кин ке курла коньдон сётэмьёсты. Мукетыз малпаське нылпиослэн кыче выжыысь луэмзы сярсы. Чиган пинальёс-а, Азербайджан, Таджикистан палась вуэмьёс-а озы уксё потто. Нош мынам йырам кугзаны кырзанлэн берпуметй чурьёсыз.

*Анай гинэ валалоз пиналзэ,  
Їушоз нылызлэсь синвузэ.*

Кытын меда та нылпиослэн анайзы, улэп-а со, палэнын-а, тодэ-а меда соослэсь тазы ветлэмзэс? Трамвайысь калык нош но нош тодаз вайиз кырзась нылпиосты. Иське, сьолэмзэс бугыртызы, тыршемзы юнме ӧз луы. ВӖзысьтым нылаш сотовой телефонзэ поттйз. Огшап витемез бере шыпак куаретйз:

– Чырткем, анай.

Мон пальпотй. Жадем йырам малпан лыктйз: ма быдза шуд со – тынад анаед вань ке. Мон но телефонме поттй, тодмо номерез кий жогак бичаз. Вазыса ой вутты на, трубкаын кылйськиз ини:

– Нылы, тон-а?



## «Мон Инмарез адзи»

**К**ельдо выжыын куать нылпи будйз, пöлысь-тызы кыкез – пиос. Бадзымез, Олеш, атай юртысьтыз яна потэм бере, кызь аресъем Мишаез но кышнояськыны косйзы. Юрт кутон со вылэ кылиз бере, анай-атай юаса-вераса öз улэ, тулыс юмшан дырря кен ваёно кариськызы.

Тупал урамысь Маняез солы курало шуыса, Миша анаезлэсь тодйз. Атаез, киродядяз но чужмуртэз колды нянь, ныртамак, куинь манет но вина кутыса, кенлы мынйзы. Анайзэс зеч иворез витыны косйзы, жök выл, пе, пуктод (кен куранэ азыло арёсы уго пилэсь анайзэ öз ик чортылэ). Одотьяпай кыштыр гинэ быззылэ. Шумпотэ, Маня – тыш-тыш мугоро нылмурт, ужась, озыен, семьяын юрттйсь йылоз. Собере, выжызы но узыр. Чеберез сокем мальдымон öвöл, со умой гинэ, чебер муртлы син усе ай.

Мумизлэн шумпотонэз Мишалы өз паласькы. Егит пилэн сюлэмыз пыжиз, уг кельшы солы Маня, гуртысьтызы мукет нылэн туганьяське. Но анай-атай кинэ яратэмез уг юало. Соослы ужась кен кулэ. Ольгаез начар каризы, вылды.

Мишалы аслэсьтыз куинь ареслы бадзым кышно-ез өз кельшы ке но, пересьёслэсь вылэ уд тэтчы. Но-мыр өвөл вылэм, но гуртоос серекьяны кутскизы: кельдоос, пе, муры ветыл басьтйллям, кык ар уло ни, кензы пинал уг вайы.

Егитгёслэн нимаз кариськемзы потэ, дыр, шуыса, пересьёс гужем соослы кеносэ валиськизы. Анай-атайёс өз тодылэ кензылэсь лушкем бёрдылэмзэ, пизылэсь Ольга доры кошкылэмзэ. Пиезлэсь юэмзэ шөдыса, атайзы чурыт кылзэ вераз ке но, егитгёс тупасагес улыны өз кутске. Маня начармиз, жыт вуыса, вужер кадь корка кузя ветлйз. Нош Миша бертэ ке, кыл-куара поттытэк, кышнопалан сиён пöсятэ. Мишаез вöзы пуксе но, картэз шоры шыпак учкыса, пуке. Шödэ вал со Мишалэсь дусы-мез дорысь бертамзэ, озыы ке но чал улйз.

Нош одйг уе картэз көлыны ик өз берты. Мукет нуналаз кышноезлэн юамез пумитэ со вылэ кизэ жутйз...

Озыы-а, тазыы-а – улйзы-вылйзы гуртоос, ужазы, семья кылдыгъязы, пинал вордйзы. Гужем нунал шödтэк шорысь кышкыт ивор вöлмиз – война. Воргоронгёс тамаксэс шыпак биняллязы, кышноос бёрдйзы, пересьёс вöсяськизы. Пиос оген-кыкен

фронтэ кошкызы. Мишалэн но дырыз вуиз. Анаез оброс азын чик дугдылытэк молитва чирдылїз. Пиезлэсь «Инмарлы уг оскиськы» шуэмзэ кылыса, эшшо зол вöсьяскылїз. Кензы гинэ ас дуннеяз усем мурт кадь ветлїз.

Изыны выдыса, Мишалэн соку ик умме усемез öз луы. Солань-талань берыкъяськыса, кышноез бордыгес кариськиз. Маня дїсьгытэк гинэ картэзлэсь кизэ кутїз но көт вылаз понїз. Пиосмурт кышнозэ зыгыртыны медэ вал но, соиз кизэ көт вылысьтыз öз лэзы, лушкем бөрдыны кутскиз. Воргорон ваньзэ валлаз. Кышнозэ лїятон вылысь маке верамез потэ но, кыльёс уг суро. Маняез, пичи пиналэз сямен, гадь бордаз жиптїз, йырсизэ маялтїз, синкылизэ чүшылїз. Картэзлэн нуныямезлы луыса-а, оже кошконзэ малпаса-а, Маня уката зол жожомиз. Мишалы кышноез нырысьсэ сокем жаль потїз. Сюлмыз уката но вöсь луиз Манялэн «яратїсько тонэ» шуэмезлы. Пиосмурт уго öз вунэты на Ольгазэ. Бен, кышноезлы дышиз, но öз яраты.

Пизэ келякуз, анаез солэн чыртыяз кирос понїз. Нош гадь кисыяз Николай Чудотворецлэсь оброссэ ватїз. Миша уг лэзы вал ке но, пересьёсты жоже уськытэмеz öз поты. Маня, картэз кошкыку, одїг синкылизэ но öз кисьты. Берло гинэ, гажанэзлэсь «астэ но вуоно нунымес уть» шуэмзэ тодаз вайыса, кема бөрдылїз на.

Миша шедиз стрелковой ротае. Ар куспын мае гинэ öз адзї: кышкыт ожмаськоньёс, бырем

эшъестэ ватон, уй куазен кезыт вуэти, дэриетй азылань мынон, со куспын ик умме усён. Көня иськем ортчемын, көня эшъес ыштэмын. Толон пиосмурт басытйз кышноезлэсь кык толэзь талэсь азьвыл лэзем гожтэтсэ. Кыче шуныт ивор: солэн пиез вань. Ярам ай, пи вордскем, выжыязы ато ваньмыз сямен нылъёс, нош юрт кутйсь одно ик кулэ. Кин тодэ, көня кыстйськоз та ож, оло, бертыны но уз кылды.

Миша дораз гожтыны дасяськиз гинэ, приказ сётйзы. Петровцы гуртэз, пе, мозмытоно. Разведчикъёс ивортйллям: немецъёс отысь кошкиллям ни. Дасо мурт, гинэ на, пе, кылемын, гуртэз сутыны дасясько. Командирзы Петровцые кызь тямсы муртэ гинэ ыстоно кариськиз. Солдатъёс дасяськыны кутскизы. Миша, бигер эшезлэсь вöсяськемзэ адзыса, өз паймы, котькуд ож азын со озы чирдылйз. Миша Рамильлы весь пумит вералляз: «Инмар (Аллах) луысал ке, та война öй потысал».

Куать иськемез ожгарчиос жог ортчизы. Гурт доры вуыкузы, куазь пеймытскиз ни. Солдатъёс эскериськизы. Ульчаосын адямиос уг адско, көня ке фрицъёс солань-галань быззыло. Гурт сьöрын нюлэс, тапалаз бусы. Уй инэз вож жуась ракета югдытйз. Со пумитазы мынэ – озыен, немецъёслэн ныр улазы шедим, малпазы соос. Гужем вазь сактэ, соин ик ожгарчиос нюлэс пала нюжтйськизы. Малпазы: тушмонъёс изыны мед выдозы ни, соку соосты пачкатоzy. Нюлэс куше вуыса, писпуос улэ интыяськыны кутскизы гинэ, кытысь ке тодмотэм

куараос кылйськызы. Миша валаса ик өз вутты: мар со сыче. Огдырлы котырак югыт луиз, командирзы «немецъёс» шуыса кеськыса вуиз. Пеймытын кин кытчы ыбылэмзэс валатэк, ожмаськызы. Немецъёс чик кошкиллямтэ, ватскиллям гинэ.

Шунды жужам бере кызь зуч солдатэз нюлэс куше сулгытйзы, пöлазы вал Миша но. Кык вавышлы азыпалан автоматъёсын немецъёс сыло. Пиме адзйтэк ик, кулйсько, пуныез сямен, ыбызы, гульдйз пиосмурт. Учконо коть, кин монэ виёз. Миша синъёссэ жутйз. Аяз тöдыгес йырсиё, чагыр синмо егит фриц. Ымдураз анай йöлыз куасьмымтэ ай, тухез но уг поты, нош пычал кутэм, вожез потэ воргоронлэн. Нош фриц со шоры учке но пал синмыныз кырмышъя. Гад, эшшо серем каре, йыркуръяське Миша. Нош соиз ялан кырмышъя. Оло, кулэм кариськыны косэ-а? Со куспын ыбем куара нюлэсэз зуркатйз. Миша ваньмыныз чöш усиз, нош вöсь луэмзэ өз шöды. Оло улэп на, оло сопал дуннеын ини. Тушмонъёс матэктйзы но эшшо огпол ыбизы, пиосмуртлэсь пельпумзэ зырдатэм кортэн сутйзы кадь. Нош вырыны но жупштыны Миша өз дйсьгы. Со вискын чилекъяса-гудыръяса зорыны кутскиз. Куазед ик бöрдйз кадь. Фрицъёс кесяськыса быззылйзы, бöрысь, грузовиказы пуксьыса, кошкызы.

Миша жыны нунал мында вырзылытэк кыллиз. Думылэм киоссэ мырдэм но кыззы мозмытыса, султйз. Котырысь суредэз адзыса, көшкемаз. Куазь зоремысь дугдйз, нюлэс кушез чильпыратыса кадь,

шунды пиштэ. Нош солдатъёсты ыбылэм интыын  
возез ик горд. Тани ук эшъёсыз, ваньмыз быремын.  
Миша вöзас кыллись Рамилез адзиз, ымнырзэ тод-  
маны уг луы ни. Бырем эшъёсыз котыртй Миша пы-  
десъяськыса ветлйз. Нырысь вузйз, сöсырмем пöй-  
шур сямен, собере бöрдонэз пöсьтйз.

Кöня озы пукысал, öйтöд, но тани кин ке солэн  
пельпум бордаз йöтскиз. Нош ик немецъес кожаса,  
Миша урмыса берытскиз, али голык кийн соосты  
виысал, дыр. Йырзэ жутйз, нош аяз тöды-тöды  
дйсен аядми сылэ.

– Тынад дырыд öвöл, мын артысь жуам гурт  
доры, со вöзысь шурез выжыса, нюке ватскы. Та-  
тын котырак тушмонъес, пырак мыныны уг яра. Уй  
вуиз ке, гурт пуме пот. Одйг иськем ортчыса, бу-  
сыысь кык бадзым писпуос доры вуод. Отысен ини  
бур пала кождо но пырак мынод. Соку асьтэләнъес  
доры вуод.

Миша, номыр валатэк, учкиз та аядми шоры.  
Паймоно кадь, йыр котыраз вуюись пиштэ, кожа-  
лод. Тöды дйсен мурт эшшо огпол Мишаез дыр-  
тытйз. Пиосмурт, номыр куаретытэк, азылань ва-  
мыштйз. Тау карыны шуыса берытскыкуз, мышказ  
нокин öй вал ни.

Бадзым писпуос доры вуытояз, оло куинь, оло  
ныль нунал ортчиз. Миша аслыз шузимем мурт  
кадь потылйз. Сютэм, жадем но сöсырмем вылаз,  
лэся, син аяз пöртэм суредъес пуксьылйзы. Зига-  
рыз воксё быриз, усёз но воксё уз султы кадь. Но

тани аяз кык-куинь тыл адскиз. Миша валаз: фонарикен югдыто. Немец сямен вераськемез кылыса, кынарыз быриз. Пиосмурт шөдйз: кужмо киос сое кык палтйз ик кунултйзы но кытчы ке нуо. Али өз ыбе бере, озьен, курадзйтозы, чилектйз йыраз. Зигартэм солдатэз кыче ке корка пыртйзы, нош марта: жөк сьорын кык немецьес пуко, соосын артэ ик зуч солдатъес чай юо. «Эн кышка, братишка, ми асьмелэньес, та синпөртман», – дйсез шоры возьматыса, шуиз огез.

Аръес ортчыса но, Миша та учырез верамысь өз дугдылы. «Мон Инмарез адйи», – шуылйз со. Со дырысен, Инмарлы уг оскиськы шуыса, өз куаретылыни.

«Улэп кыли ке, оскымон кузпал но зеч атай луо», – сйзиськиз пиосмурт. Сётэм кылзэ со быдэстйз.





Литературно-художественное издание

**Савина (Семёнова) Галина Яковлевна**

## **КЫШЕТ**

*Рассказы*

*На удмуртском языке*

Подписано в печать 12.02.2015 г. Формат 11,5х16,5  
Бумага: 80 гр., обложка 300 гр. Печать на ризографе.  
Тираж 50 экз. Заказ № 2822

В авторской редакции

Вёрстка, дизайн *В. Д. Штыкова*

АУ УР «Редакция газеты «Удмурт дунне».  
Адрес: 426008 г. Ижевск, К. Маркса, 274.  
Тел. (3412) 73-33-42. E-mail: udmdunne@yandex.ru

Отпечатано отделом оперативной полиграфии  
АУ УР «Редакция газеты «Известия Удмуртской Республики».  
Адрес: 426011 г. Ижевск, ул. Пастухова, 13.  
Тел. (3142) 902-135. E-mail: poligrafur1@yandex.ru